



佛道。是菩薩觀十方國土，知何處有可利益衆生處，故爲受身生其國。如是等名爲阿鞞跋致相。

是菩薩一心深念，常不離阿耨多羅三藐三菩提故，但貴阿耨多羅三藐三菩提，不貴餘事：所謂諸佛三十二相金色身。不捨本願度衆生故，不貴聲聞、辟支佛道，是人貴無所得畢竟空故，不貴是布施，乃至不貴種善根，何況五欲世間利養！何以故？菩薩觀一切法自相空，不見實定法可生貴心。有人有所貪貴故，心動不能自樂，若得則歡喜，失則憂戚。菩薩無所貴，無所貪故，至於得失，心清淨不動故。身行、口行調和不異故，身之威儀，一心常念，無所遺失。

一心不散亂，盡攝諸善法。何以故？貪重佛道故，一切諸煩惱折薄，是故於衆生深加慈心，能自以身命給施，何況不知報恩等？常一心念阿耨多羅三藐三菩提，清淨持戒故，不行邪命。若有作者，爲攝衆生，破其僞慢，使知一切諸法相空。

佛告須菩提：「阿鞞跋致菩薩摩訶薩，行般若波羅蜜時，住內空、外空，乃至無法有法空，住四念處，乃至空、無相、無作解脫門；於自地中了了知。不疑我是阿鞞跋致，非阿鞞跋致。何以故？乃至不見少許法於阿耨多羅三藐三菩提中，若轉若不轉。……自住其地，心常不動，一切世間天、人、阿修羅不能動轉。何以故？是菩薩摩訶薩出一切世間天、人、阿修羅上，入正法位中，自證地中住。具足諸菩薩神通，能淨佛世界，成就衆生，從一佛界至一佛界。於十方佛所，植諸善根，親近答問諸佛。是菩薩如是住，種種魔事起，覺而不隨，以方便力，處魔事者實際中，自證地中，不疑、不悔。何以故，實際中無疑相故，知是實際非一非二。……是菩薩摩訶薩乃至轉身亦不疑我當得阿耨多羅三藐三菩提，若不得。何以故，諸法自相空，即是阿耨多羅三藐三菩提。是菩薩摩訶薩住自証地中，不隨他語，無能壞者，何以故？是阿鞞跋致菩薩摩訶薩成就不動智慧故。以是行、類、相貌，當知是阿鞞跋致菩薩摩訶薩。」

阿鞞跋致菩薩摩訶薩，行般若波羅蜜時，爲護持諸法故，不惜身命，何況餘物。是菩薩護持法故，作是念：我不爲護持一佛法，我爲護持三世十方諸佛法故。云何菩薩摩訶薩不惜身命？如

佛說一切諸法眞空。是時，有愚人破壞不受，作是言：是非法，非善，非世尊故！菩薩爲護持如是法故，不惜身命。」

菩薩不著法性，憐愍衆生，爲種種分別善、不善法等，令衆生得解。雖爲衆生如是說，亦常讚歎不壞法，引導衆生令入法性中故。阿鞞跋致菩薩更無親善，但以諸佛及大菩薩，諸能讚歎諸實相法者爲親善。是人功德智慧大故，隨意所往，若欲至諸佛世界，隨意得生。是菩薩雖離欲得諸禪定，以方便力故，爲衆生欲界有現在佛處。生欲界者，故爲衆生留愛慢分，不以此禪定果報生色、無色界。但以禪定柔和其心，不受眞報。

是菩薩安住內空等諸空中。安住者，深入通達，心無所著，故不生疑：我是阿鞞跋致、非阿鞞跋致，自心中深入智慧故，是名自證地。又是人見一切法若轉若不轉，是故不生疑。「疑」名取相有所得，如人夜見樹機，尋復生念：「人形亦爾。」便生疑心。若取此二相故名疑。若菩薩行無相三昧故，於一切法中不取相，則無生疑處。諸生疑者，見違失事，不如本所聞故。是菩薩於一切法畢竟空故，不得是不如所聞法，疑無住處，故無疑。自知此是究竟道，不可論，不可破。住是地中，教化衆生，淨佛世界，亦能以方便力故，破種種魔事。是阿鞞跋致法常隨逐菩薩，乃至成佛。

又是菩薩深愛法故，能捨身爲法：若佛、若佛弟子，於大會種種因緣，說諸法畢竟空。有一狂人取音聲名字相，著是畢竟空，出其過罪；若諸法畢竟空，則無佛、無法，無罪福業因緣，亦無修行精進，得道果報。如是等出無量過罪。阿鞞跋致菩薩，觀察籌量，知說法者有無著心，隨佛語憐愍故說；知狂人著語言取相，破是畢竟空。爾時，阿鞞跋致，則沒命佐助言：「是狂人！是邪人！自沒邪見，亦多化衆人，令墮邪見壞滅佛法。」深懷瞋恨故，或自殺，或使弟子殺。爾時，菩薩若死事至，爲佐助法故，不以怖畏而壞諸法性。菩薩作是念：「今爲十方三世諸佛法，佐助發起，若有益而死，勝無益而生。」如是等爲法故，不惜身命。

阿鞞跋致菩薩，於甚深佛法中尚無疑，何況無生忍初門，常修習柔順忍增長故，斷法愛，得無生法忍，入菩薩位，永不退轉。